



#18 - La cjase de lontanance

O soi vignude a stâ te cjase de lontanance, dulà che il timp si è fermât.

La cjase e à cuatri puartis: cuant che e je ore di lâ vie no bisugne vê intrics, e ancje barcons grancj par cjâlâ il mâr e il cîl.

O ai picjât il to ritrat parsore il jet cui bleons blancs.

Ogni matine o cîr di visâmi un particolâr di te: une sclese dai tiei voi, il to mût di ridi,chel çuf di cjavei che nol sta mai a puest, e o pituri un altri ritrat.

Lu picji sul mûr dongje di chei altris, e dopo ur volti la schene e pal rest de zornade o cjali il mâr.

Mâr vert che si rondole, mâr scûr che si sdrondene, mâr celest che si confront cul cîl.

Un dì l'aiar al puartarà un sbrendul di vele, o la corint un ramaç slissât framieç des slavaris di un flum. Al sarà il segnâl.

Te sporte o metarai dome ce che al covente par partî: un tabâr pai dîs di buere, un cjapiel par la canicule, une buracje cun aghe di risultive. Pan e miluç a bastaran di mangjâ.

O larai vie e o lassarai dutis lis puartis viertis, i barcons spalancâts.

I tiei ritrats, un plui smamât di chel altri, a restaran sul mûr.

di***

#1***